



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Manchester City den Erling Haaland contract tasen zülutepogo

Al-Qadir Trust ken o nung Imran Khan aser kinungtsü tepuokdak ayutsü

VOL. XXII ISSUE NO. 94 (ADOK 94) DIMAPUR

KÜPTOKNÜ (SATURDAY)

AENJETI (JANUARY) 18, 2025

₹ 5.00

Mokokchung nung lanur 2 soseter lia angu

Mokokchung, January 17, 2025 (TYO): January 10, 2025 anogo nü Mokokchung jila nung samaogo ta ser bushitepa aruba lanur ana tasü mang tanü nguogo. Tena ya Esther aser Moasunep na liasü aser tenaprong arishi küm 19 tain liasü. January 17 nü Mokokchung kübok Alempang ward anasa süngdong ka nung tena alenseter lia angu. January 10 nü tena samaogo ta osang agütsü aser iba jagi Mokokchung Police Station nung missing person's report ka

benok aser idangjisa lookout notice ka agütsü ta police-i ashi. Ajsüaka, tena indang call detail records, tower locations, mesüra bank transaction analysis nungi tsüngsü kecha menguteti aru. Tena samaba anogo nungi tena indang mobile phone tem switched off ser liasü ta police-i ashi. Tanü district administration aser kuliserterem lia post-mortem süogo aser iba nung taitü aketba kecha majitet. Iba sülen tena kibongtem ket nung mang agütsüogo aser iba tatalokba atema maneni bushisüngdang südar ta police-isa ashi.

NFHRCC-i River Jungju nung apu yangluba semdang

Dimapur, January 17, 2025 (TYO): NFHRCC-i January 17, 2025 nü River Jungju temdanga yangluba 2nd Double Lane Galvanized Steel Bridge semdangogo.

Iba apu ya Haiyian-Liphi Village, Baghty Sector, Bhandari Sub-Division nung lir aser Quinker Enterprises ajanga Rs.2.04 crore endoka ita 11 nung yanglutsü sentong lir.

NFHRCC den Implementing Agreement nung sign sütepertemi tekaratiba nung mapa tenzütsü imlar ta parnoki ashi.

Firms/Contractors kari Implementing Agreement nung sign mesü lir anungji January 20, 2025 tashi nung sign asütsü metetdaksür ta NFHRCC-isa ashi.

Implementing Agreement nung ano sign masürtem:

1. M/S Yanna Enterprises - Naganimora Division
2. M/s Pongshi Phom & Sons - Longleng Division
3. M/S Shangpoh Konyak - Mon/Tizit Division
4. M/S Onkho Construction & Supplier - Mon/Tizit Division

5. M/S Ren Kik_E.Z,J & Co - Baghty Division
6. M/S JK Constructions - Baghty Division (Two Work Orders)
7. M/S Chabou & Co - Baghty Division.

Nagaland Foothill Road Coordination Committee (NFHRCC)-i kin asem hoho- Ao Senden, Lotha Hoho, aser Sumi Hoho nung den külemi senden ka menogo.

Iba senden ya Mokokchung nung Ao Senden headquarters nung amen aser idangji Special Assistance to States for Capital Investment (SASCI) scheme kübok tang teyangludak foothills road mapa indang lemsatöp.

Parnoki tebilemba aika lemsatöpba sülen 2013 nung foothills road yangluba atema kija, kidong mesüra yimtsüng shinga nem-a temenok magütsütsü lemtetba bangjemshitepa liasü.

Iba bangzüng anema inyakerterem dak NFHRCC aser kin asem Hoho temi tapet mapa inyaksü ta senden nung adenertemisa lemtetba metetdaksüogo.

Naga nung kulem meyong Customary law kaket ka akatsüla.T.R.Zeliang



Mokokchung nung Nagaland Dobashi Association 22nd Triennial Conference cum 63rd Anniversary sentong akadang Nagaland Deputy Chief Minister T.R.Zeliang-i jembiba (Abelen) aser Watsü Mungdang-i (Achiji) sobaliba ken ka atandang tangokba noksa.

Mokokchung, Aenjeti/January 17(TYO) :Nagaland stateya 16 Point Agreement nung ajemdaker Special Provision jenjang nung kümtetogo yaasoshi asenok Nagas of Nagaland nüburtemi kanga dang pelatsülata Mokokchung nung Nagaland Dobashi Association 22nd Triennial Conference cum 63rd Anniversary sentong akadang Nagaland Deputy Chief Minister T.R.Zeliang-i jembidang ashi.

Nagaland Deputy Chief Minister T.R.Zeliang-isa Naga nung tamangba yimsü aser

sobaliba nung tangari meinprong masütsü, Naga nung sobaliba nung tangar teka meitetsü, Naga nung sobaliba ajanga telemtetba agütsüba nung tangari tanaben obendang agütsütsü mekoktettsü, ali temeden aser ali tema aser ali telung nung alibaji Naga nung dak alaka shingia agütsü makok ta item pezüji meja meja-a asen Nagas of Nagaland nem temeden agüja tanü asen Naga nung balaka nung state amenteta lir, North East India nung state 8 nung special provision agüja lir,saka Naga nung nem

agütsüba ali tema aser ali telung nung alibaji Naga nung dak alaka shingia agütsü makok ta asüba temedenbo tangar nembo magütsü. Iba temeden yabo Arunachal, Manipur aser Assam nung aliba Naga nungtem nem magütsü saka Nagas of Nagaland nübur nem dang agütsübaji asenok asoshi temoatsü kanga dang tulu, anungji iba temedenji Dobashi-temi kanga dang shisa kaa amshitsüla ta adenshia aliba Naga nung Dobashi-tem ayongzüka jembiba.

(Maneni tapak 2 nung...)

Indo-Myanmar arrtsü atsü dangba magizüker: United Naga Council

Imphal, January 17, 2025 (Agencies): Naga aser Kuki-Zo nungeri anema noktaka India sorkari Manipur nung Indo-Myanmar arrtsü nung kilometer 10 shi atsü dangogo.

Manipur-i Myanmar den kilometer 398 agi arrtsütepa lir aser tang Tengenoupal district nung Moreh anasa arrtsü atsü dangba mapa inyaker.

Arrtsü atsü dangba osang angashiba sülen United Naga Council (UNC) president Ng. Lorho-i anir Naga nung

teshimtet telok kati Border Pillar 81 semdanga liasü.

Border Pillar 81 nung aser talisa Naga nung yimtsüng Satang nung arrtsü atsü dangba anguba sülen UNC-i sangdong ka agütsüogo.

Naga nungeri kodanga India aser Myanmar tsüngda tenangzüktep agiba magizük. Iba arrtsü ya artificial aser imaginary line ka dang lir ta UNC-i ashi.

Arrtsü atsü dangba mapa ajanga timtem kar danga adokra iba tebilemstü khuretji India aser

Manipur sorkartemi abentsü ta UNC-isa metetdaksü.

Naga nung teshimtet telok nung Naga Civil Political Organization (CNPO), All Naga Students' Association Manipur (ANSAM), Naga Students' Union Manipur (MSU), All Naga Council for Human Rights (ANCHR), Rengma Naga People's Organization (RAMO), Naga Council of Churches (NCC), aser Satang, Choktong, Lamlong Khunou, o Waksu yimtsüngtem nungi nisungtem dena liasü.

OM 61 buba inti mungdang tasü aittsü omen dak rangloker amung



Dr. S.C Jamir



Rev. Dr. Kari Longchar



S Supongmeren Jamir MP

Mokokchung, 17 JAN (TYO): "Tasü Itang" omen dak rangloker Ongpangkong Mungdang pur 61 buba inti senden yangi Khensa yimdak takok ngua mungogo. Iba mungdang nung OM kübok unit

40 nungi tejaoker nisung 300 jungnüa adenshia munga liasü.

Tanü iba sentong nung Nagaland Lok Sabha MP, S. Supongmeren Jamir-i jembidang, taoba konang nüngsang nung dang lira asenoki tangar

memeneptsü, anungji, ochi dak amendaker tejakleni aotsü ayongzüker. Tasü aittsü asoshi ochi ashitsü nüngdaker, kechiyong ochi meshira tasü meitetsü, ta pai ashi.

Tsüngremer maongka den

Naga kini pa nem ochiba nung yimli agütsüba asoshi pelaba den pa nem koba wadang nungloksüogo, ibaji Ongpangkong nunger chanu ka ama, Ao kin aser Naga nunger ka ama ochi shia inyaksü merangtsü, ta pai metetdaksü.

Tanü pa MP jenjang tongtetba ya Ongpangkong nunger maongka ajanga lir, ta pai pelaba lemsatöp.

Tsüngremer Ongpangkong nunger nem maongka tulu agüja lir, anungji, iba khuretji angateta ochi shia Ao kin aser Naga nunger songjen ajungtsü asoshi inyaksü, pai mungdangsanger ayongzüker.

Tajungshi o jembir taoba Governor aser taoba Nagaland Chief Minister, Dr. S.C Jamir-i jembidang, tsürabur mapang sobusolem tongmelang liasü saka parnok ochi nung liasü, saka tanü

Naga nunger sobutsübo melen saka shisatsübo memelenshi, ta metetdaksü.

Asenok dak tashi mait kaji; tambu tantsü dang rakteper aser tejen putu indang dang jembir, saka tarutsü asoshiho mejembir. Yashi aika süiogo aser asüng aika arutsü lir saka tanü nai kechi inyaker ta asübaji kanga tongtibang lir, ta pai ashi.

Paisa Naga yimden tebilemstü tsütsü olen kar lemsatöp dang, tanü telungpur telok paika akümba ya nükjidong amatokba ajanga lir. Jembiba o inyakba na balala. Naga yimden ka dang saka telokbo 26 lir, iba jagi asenok alizüng matonger, ta ashi. Küm 20 lir tenangzüktep (Agreement) kar yangluogo saka yangji "sovereignty" aser "integration" onük bo densema mali, ta pai shiogo.

(Maneni tapak 2 nung...)



Langnok yimdam January 16, 2025 nü 'Progressive Society' omen nung ajemdaker 23rd Nokhu Range Public Organization (NRPO) cum Hok-Ah Festival 2025 sentong MP Lok Sabha, S. Supongmeren Jamir-i moaja liasü. MP S. Supongmeren Jamir-i sentong nung jembidang, lokti tejakleni aotsü atema yimten mangdang tajung, shisaliok tajung, rongsenketzüng tashi tait aser temulungtetba tajung aliba nisung nungdaker, ta ashi aser lenla ajak nung maneni meranga inyaksü ayongzüük.

Mokokchung nung Republic Day 2025 amungtsü atema metetdaksür

Dimapur, Aenjeti/January 17 (TYO): Deputy Commissioner, Mokokchung, Thsuvisie Phoji, NCS ajanga Ungma, Mokokchung, Chuchuyimpang, Khensa yimtsüngtem nungi putu menden aser GB's union, Mokokchung Town GB's unio aser ward 18 nung ketdangsurtem aser Mokokchung Town nung aliba nübür ajunga dang sangdong ka nung 76 buba Republic Day sentong ya akhi ama Imkongmeren Sports Complex,

Mokokchung nung January 26, 2024 anepdang 8:40 ako nungi tenzüksü, ta metetdaksüogo.

Ajungji ketdangsurtem aser Mokokchung Town nung aliba nübü ajak iba sentong nung arua adentsü ayongzüük, ta sangdong ajanga ashi.

Ano maneni Deputy Commissioner, Mokokchung ajangasa sangdong ka nung Mokokchung Town telungzüük nung aliba sorkar tenzüker ajak dang akhi mapang ama 76 buba

Republic Day sentong ya January 26, 2025 anepdang 8:40 ako nungi Imkongmeren Sports Complex, Mokokchung nung agitsü ta metetdaksüogo.

Anungji sorkar tenzüker ajak iba sentong nung adentsü metetdaksür, ta sangdong ajanga ashi.

Maneni District Head of Officers ajunga dang pei staff indang attendance agia meyongnem agütsür rostrum tesülen in-charge nem sentong temer agütsüsü metetdaksüogo.

Naga nungger külem meyong ...

(Tapak 1 nungi...)

Naga nungger customary ken o High Court aser Supreme Court dangi abener saka ibaji parnoki mebendangteter kechiaser Naga nungger Customary law-ji parnoki memetet aser Naga nungger meyong Customary law kaketmaka, anungji Naga nungger külem meyong Customary law kaket ka akatsü kanga dang nungtaker, Naga nungger kin balala nungi temetetertem luden ka tenteter Naga nungger asoshi temeja Customary law kaket renemtsülata Deputy Chief Minister T.R. Zeliang-isa ashi.

Sentong nungsa iba mungdang Chieftain, Commissioner Nagaland Shri. K.S. Anden Konyak, IAS-i tajungshi o jembidang Dobashi-tem maparentemji British nunggeri jangjaa meteta kuli tajung agütsü, Naga lima nung Dobashi mapa shisadangra ali, kimung aser sobaliba ken o nung o bendangtejangja agüja nübür liromedema tanu tashi ania

arudagi, sobaliba ken o nung o bendang agütsüsüji temelabo masü saka Dobashi-temi Tsüngremi agütsüba sempet timi amshia Tsüngrem angateta ochishia inyaka Naga nungger asoshi inyakba Dobashi-tem nem tenüngsang agüja ashi.

Dobashi-temji obendang agütsüba mapa inyaksüba dang masü saka iba mapa dangji tematiba ka lir, Dobashi-temji nübür nükrangdong aser nübür asoshi yimjung bener ka lir, anungji Dobashitem taküm asüngteta aliba taküm kaka asütsüla Commissioner Nagaland Shri. K.S. Anden Konyak, IAS-i adenshia aliba Dobashi-tem ajungshia jembidi.

Ao Senden Tongti Zülur Wb. Intipokym-i Otep tatsüka jembidang alima nung sobaliba aika lir saka item rongnungji Naga nungger sobilibaji taküm aliba sobaliba lirta ashi.

Asen sobaliba meraket wazüka ayutsüji Dobashi-tem aser yimtsü yimbutemi dang inyaktetsü,

anungji Dobashi shimba nung Political tashi mamshitsüla aser chichiba sobaliba meteter shimtetsülata ashi.

Nagaland GB Federation Tatong Tir-ia mapang tatsüka agia Otep jembidang Naga lima nung Dobashi aser Gaon Bora-temi ochishir asütsüla, nübürtem nem obendang balala agütsüdang süpokrem nükhisha aser kelen tsütsü phukümba nung malitsüla, Dobashi aser Gaon Bora-temi asen Naga nung sobaliba tzüzung ozüngji akhümtsüba beshitsülata ashi.

Mokokchung Town Baptist Arogo Pastor Rev. Tamsüwati-i sarasadema sentong tenzüük ase Mon District Dobashi aser Watsü Mungdang teloki sobaliba ken aten aser tatem nung Tenyimia Baptist Xhurch, Mkg. Pastor Teyalo Seb-i Tsüngrem nem tenüngsang agüja sarasadema sentong tembangba den Nagaland Dobashi Association Vice-President Lungrahei Herie lenisüba nung iba sentong agi.

OM 61 buba inti mungdang...

(TAPAK 1 NUNGI...)

Paisa pungmang tasen ka pungmangtsü, nükjidong tasen ka yanglutsü, jembiba ama teinyaker akümtsü aser yashi dang nungi tanü tajungba inyaksü, aser tzükong ta melemsai Aor aser Naga nungger ta bilema inyakkdaksünür, ta paisa ayongzüka liasü.

Tanü alima shirangba ya yimdong nung ochi laodaktsüba ajanga lir, anungji, ochi mesotsü asoshi mezüngbuba asenok melenshitsu la aser asenok dak tamajung alibatemji intoktsüla, ta tongti o jembir, Missionary-at-large, Rev. Dr. L. Kari Longchar-i "tasü itta ochiba mesoang" onük nung ajemdaker jembidang lemsatap.

Paisa ochi mesotsü asoshi melenshidaktsünüba kar ashidang, asen lima election dak sentakba nung ochimashi

mapatem melenshitsu, census tai yangluba melenshitsu, lipoklisang otsü tiyazü meyanglutsü, asüküm toktsütsü, temelenshi tasen ka tenzüksü aser Tsüngrem dang asen tai temenentem nangzüka tatok meshitsu asoshi ayongzüük.

Tejen putu süiogo, anungji, tamapur tesü aser tesüpur tama, aser tulur kümür tila akümtsü aser tila akümnür tulu kümdaktsütsü Laishibai ashir. Anungji, ajemalua tila akümba den "lungtrok" masü "Teyanglur Tsüngrem" ochiba nung külemtsü asoshi paisa ayongzüük.

Iba sentong nung Mokokchung ADC - Chumlamu Humtsoe NCS, Ao Senden Tir - Marsanen, Khensa Village Council Chairman - I. Alemmeren Longchar, OM tir - Lipokmeren Jamir aser tangartemia shilem balala agi.

Nikong senden nung "Sobaliba nung kümümshiba" onük nung ajemdaker Mokokchung yim nungi yimsüsür Imonungba Longkumer Tatar-i onük tajung aika bener arua lemsatap. Dr. S.C Jamir-i Ongpangkong Zünket Naklu omen ken ka tenüng agi "yimsowar" sayatsüogo.

62 buba Ongpangkong Mungdang 2025-2027 kümsük anitsü atema ketdangpur itemi teloki mulunga shimogo: Tir - Alemtoshi Imsong (Ungma), Tatong Tir - Tinumayang (Longkhum), Tongti Zülur - Tiawapang Walling (Khensa), Repsem Zülur - Imtisunep (Meküli), Sen Zülur - Takosungba Lkr (Kinunger), Sen Zülur Yariba - Noksülemba (Chubayimkü) aser Kimen - Pangernukshi Imchen (Mangmetong).

R.S. Jamir, IPS (Retd.) asükhü lemsateper

Dimapur, Aenjeti/January 17 (TYO): Eden Medical Centre, Dimapur nung January 16, 2025 nü Rongsenshilu Jamir, IPS (Retd.) asüba osang angashia temulung shiranger, ta Nagaland Chief Minister Neiphiu Rio-i sangdong ka nung ashi.

Rongsenshilu ya Naga nung Inspector General of Police mezüngbuba aser pa ya ochishir nisung ka liasü, shiba meranga inyaka aser jangratema aser abensa liogo. Pai President's Police Medal for Meritorious Service nguogo aser Indian Police Service nung induct asü. Pa wadang nung shilem tajung agiba dak alia ano pa ya temeim aketba nisung ka liasü, ta CM Rio-i ashi.

Pa asüba ya Ao kin dang masü saka Naga nungger ajunga asoshi akhumtong aser tebu tajung ka samar alitsü. Pa asen den meliaka pai bendanga agütsür nübür ajungshi asoshi inyakba aser State atema mapa tajung inyakba teti bilemtetsü, ta ashi.

Tang mangyim tejashi mapang ni aser ozü kibongi mangyimer kibong den asükhü lemsateper aser Tulusang Tsüngrem-i tasü tait

mulungsentsü agüjang ta sarasademtsür. Asür tanüla teti tatem maka tesunep nung anisüngzüükjangma, ta Nagaland CM Rio ajanga ashi.

NDPP Secretary General Abu Metha teko (father-in-law), R.S. Jamir, IPS (Retd.) asüba osang angashia tejashi lemsateper, ta Nationalist Democratic Progressive Party (NDPP) tir Chingwang Konyak-ia sangdong ka ajanga ashi.

Asür R.S. Jamir ya police tanishir ka ama aser mapa nungi anisüngzüük ngura nübür aser state bendanga agütsür tenzüka nisung tejangja liasü.

Naga nungger Inspector General of Police (IGP) ka ama pa arishi talang liogo aser iba mapang pai wadang balala nung takok jenti ngutetogo, ta sangdong ajanga ashi.

Pa asüba ya state asoshi arishir ka samaba alitsü, shibai anibelem mesasai nübür tenzüka liasü.

NDPP ajanga Abu Metha, pa kinungtsü Toshila Metha aser mangyimer kibong den asükhü lemsateper. Asür tanüla teti tesunep nung anisüngzüükjangma, ta NDPP sangdong ajanga ashi.

NCSN/GPRN ajanga Fuel Stations mürekmejutsü tuyur

Dimapur, Aenjeti/January 17 (TYO): Nagalim nung Oil Pumps/Fuel Stations aika nung free air filling machines aser metzü meshiba tesem amala magütsüba mesüra anepalu masüba ajiteter. Aser metzü meshiba tesemtem mürekmeju mesür ayuba ajanga nübürtem temang nung timtem ajurutsüsa

jenjang nung lir, ta NCSN/GPRN sangdong ka ajanga ashi.

Anungji Oil Pumps/Fuel Stations ajunga dang nübürtem amshitsüsa item tesemtem tekeratiba nung yanglushitsu/ yanglutsü metetdaksür. Iba totuyuba sülen manidaker nem temerenshi agütsüsü, ta sangdong ajangasa ashi.

Niuland DPDB senden menogo



Dimapur, Aenjeti/January 17 (TYO): Niuland District Planning and Development Board (DPDB) senden January ita atema Deputy Commissioner, Niuland indang Conference Hall nung January 16, 2025 nü DC & Vice Chairman, DPDB Niuland, Sara S. Jamir lenisüba kübok menogo.

Board ajanga taoba senden nung lemtetba tem lepa repringshi aser Department of Land Resources indang office yanglutsü aser Hokuto Village nung Government Primary School tasen lapoktsü indang jembir agizüka liasü.

Senden nungsa Khuboto Town nung slab culverts

yanglua inoktsü agizük aser tim ketdangsur dangi yok.

Iba senden nung Horticulture department ajanga PowerPoint presentation agütsüba nung district kübok tang teinyakdak projects, schemes aser takok anguba tem lemsatepa liasü.

Taruba senden nung Department of Power nem par department inyakyim indang PowerPoint presentation agütsüsü nungloktsü.

Iba senden nungsa Republic Day atema mapa alemtsü jembia liasü aser iba anogomung nung department ajungai shilem tajung agitsü ayongzüük aser menden nungi melepzüng o jembia senden tembanga liasü.

Delhi elections atema BJP-i manifesto sayaogo



January 17, 2025 nü New Delhi nung Delhi assembly election atema BJP manifesto sayaba sentong nung BJP National Tir, JP Nadda den party lenirtemi osangbenertem den jembidang tangokba noksa nung angur.

New Delhi, Aenjeti/January 17 (Agencies): Kobi melii Delhi nung assembly election agitsü lia Hokolbarnü Bharatiya Janata Party-i party manifesto sayaogo.

Tetsürtem, sensakertem aser kanga teintet sensotem taküm jenjang ajungketsütsü mangdang yur manifesto renem. "Sankalp Patra" ta ajaba manifesto nung Holi aser Diwali benjung mapang gas cylinder angati agütsütsü, mashisa tetsürtem nem sen 21,000 agütsütsü aser arrshi küm 60 nungi 70 tsüngdapur teintet sensotem nem pension sen 500 tali tutsütsü nangzüka lir.

BJP-isa, tang Delhi nung aliba welfare schemes maneni alitsü, ajisüaka parnoki sorkar tentetra

public welfare schemes nung aliba ochimashi bushisüngdangtsü, ta metetdaksü.

Manifesto sayaba sentong nung jembidang BJP national Tir, JP Nadda-i, "BJP sorkar aru nunga Delhi nung tang aliba public welfare schemes maneni alitsü. Item schemes tajungba benoktsü aser item schemes nung ochimashi samatsütsü," ta metetdaksü.

Paisa, "Parnok (AAP) indang mohalla clinic nung ochimashi jenti lir aser iba ya nürburtem ashioxtsüba programme ka lir. Pa (Kejriwal) indang Mohalla clinics nung taila tests agir aser sen crore 300 nung ochimashi liasü. Kodang ozü sorkar arudir item ajungaji jungjunga

bushisüngdangtsü," ta metetdaksü.

Delhi nung February 5 nü assembly election agitsü aser February 8 nü vote azüngtsü.

BJP manifesto nungsa, Matru Suraksha Vandana scheme kübok mashisa tetsürtem nem nutrition kits 6 agütsütsü aser sen 21,000 agütsütsü nangzüka lir.

Sensaker tetsürtem nem cylinder sen 500 agi agütsütsü aser Holi & Diwali benjungtem nung gas cylinder kaka angati agütsütsü; Mahila Samridhi Yojana kübok Delhi nung tetsür shia nem sen 2,500 agütsütsü aser Atal Canteens nung Delhi kübok slum nung alirtem nem chiyungtsü sen 5 agi dang agütsütsü. Iba atemaji Atal Canteen Scheme tenzütsü.

Arrshi küm 60 nungi 70 tsüngdapurtem nem pension 2,000 agütsü aliba nungi sen 2,500 kümtsütsü aser arrshi küm 70 ser temapur teintet sensotem, amitsürtem aser meshimejunger tetsürtem nem sen 2,500 agütsü aliba nungi sen 3,000 kümtsütsü, ta manifesto nung nangzüka lir.

Delhi nung Ayushman Bharat scheme benoktsü aser Delhi sorkar nungia teyari sen lakh 5 tali agütsütsü. Delhi nung alirtem nem Ayushman Bharat scheme kübok health cover sen lakh 10 tashi agütsütsü, ta parnokisa nangzüko.

Budget senden January 31 nungi tenzüksü

New Delhi, Aenjeti/January 17 (Agencies): Parliament nung budget senden mezüngbuba shilem January 31 nungi February 13 tashi amentsü aser tanabuba shilemji March ita tanabuba hopta nungi April ita mezüngbuba hopta tashi amentsü.

Union finance minister, Nirmala Sitharaman-i tang agi tibenbuba budget benoktsü.

January 31 nü linük Tir Droupadi Murmu-i Lok Sabha aser Rajya Sabha külem senden nung jembitsü, iba sülen economic survey benoktsü.

February 1 nü finance

minister, Nirmala Sitharaman-i union budget benoktsü.

Parliament senden mezüngbuba shilem nung Tiri jembiba sülen Lok Sabha aser Rajya Sabha naprongla nung o enteptsü aser Ato kilonser Narendra Modi-i House anaprongla nung jembia senden tembangtsü.

Nirmala Sitharaman-i 2025 Budget benoktsü atema ita ka piyong industry aser sector stakeholders den senden aika mena aruba sülen January 6 nü tembangogo.

Finance Ministry-i sangdong ka ajanga, "December 6, 2024

anogo nungi tenzüka onoki telok aika den senden mena aruogo. Stakeholder telok 9 nungi nisung 100 den teimba den o lemtepa aruogo. Parnok rongnung aluyimertem associations, aluyimba tsütsü economists, shishilembaba unions, education aser health sector, MSME, trade & services, industry, economists, financial sector aser capital markets nungi mongintem aika densema liasü. Item senden nung infrastructure, energy aser urban sector nungia ketdangsertem aika jaoka liasü," ta metetdaksü.

Maoists telungpur 12 khaset

New Delhi, January 17 (Agencies): Brihostibarnü Chhattisgarh kübok Bijapur district nung security sepaitemi Maoists telungpur 12 khasetogo, ta police ketdangser kati metetdaksü.

Anogo ishika jakedang kasa district nung telungpurtemi improvised explosive device (IED) ka pokdakja amakdang police 8 pokseta asü.

Brihostibarnep 9:00 ako meta south Bijapur nung aliba arem ka nung security sepaitemi telungpurtem mita aoba mapang nung parnok tsüngda khatap tenzüker aser aonung tashi khatapa liasü, ta police-i metetdaksü.

District asem nungi state police District Reserve Guard (DRG), CRPF indang CoBRA (Commando Battalion for Resolute Action) sepaitem aser CRPF 229th battalion nungi

sepaitem senteper Maoists telungpur mita aoba mapang nung rara tenzüka liasü.

"Iba rara nung telungpur 12 khasetogo. Tang tashi iba tesem nungji telungpurtem mita odar," ta police ketdangserisa metetdaksü.

Raraba tesemji district headquarters nungi kilometer 150 shi pilar lir aser iba tesemji Maoists' battalion No. 1 amenoka aliba tesem lir. Bastar region nung telungpur aika aliba tesemji iba tesem ya lir, ta police-i metetdaksü.

Tan ita kija nung Chhattisgarh nung Maoists 26 khasetogo. January 12 anogo nunga Bijapur district nung security sepaitemi tetsür ana densema Maoists pongu khaseta liasü.

Yaküm Chhattisgarh nung sepaitemi Maoists telungpur ajak senteper 219 khasetogo.

Ukraine nung Russia atema rarar India nunger 12 süogo: MEA

New Delhi, January 17 (Agencies): Tang Russia-Ukraine rara nung Russia sepaitem atema raratsür India nunger 12 süogo aser India nunger 16 bo samaogo, ta Hokolbarnü Ministry of External Affairs (MEA)-i metetdaksü.

Osangbenertem senden nung jembidang MEA otongdar, Randhir Jaiswal-i, "Tanü tashi nung Russia Army nung tenzüker (India nunger) 126 liasü. Parnok 126 nungjagi 96 bo India-i meyipa aruogo aser Russian Armed Forces nungi anisüngzüko. India nunger 18 tang tashi Russian Army nung lir, aser parnok 18 nungjagi 16 bo kong aliar memetet," ta metetdaksü.

Jaiswal-isa, "Russia-i parnokji samaogo ta züngshir. Onoki tanüngba India nungertemji tekeraba nung chioxtsü aser linüki meyipa yoktsü atema inyaker. Russian Army nung tenzüker India nunger 12 bo süadokogo," ta metetdaksü.

Tawa Ukraine rara nung

Russia army nung tenzüker India nunger ka süogo aser ka yirua hospital nung mongdar.

Ukraine rara nung Russian army nung tenzüker Kerala nunger Binil Babu asü. Pa tasümanji India-i bener arutsü atema Indian embassy-i Russia nunger ketdangsertem den tongtepratepa inyaksangshidar.

Ano India nunger Jain TK rara nung yirur Moscow yimti nung aliba hospital ka nung treatment tagidak lir. Pa treatment tembangba sülen India-i meyipa arutsü.

Binil Babu asüba dak sendakba nung MEA otongdar Jaiswal-i-i, "Binil Babu asüba atema kanga sasa bilemstür. Onoki par kibong den mangyim jashi lemsatopogo. Tekeraba nung pa tasümanji India-i bener arutsü atema asen embassy-i Russia nunger ketdangsertem den tongtepratepdar," ta metetdaksü. Mongolbarnü MEA-i, Moscow nung aliba Indian embassy-i India nunger ana kibongtem den tongtepratepdar aser akokba tashi yaritepdar, ta metetdaksü.



January 17, 2025 nü Bengaluru nung US Consulate lapokba sentong nung External Affairs Minister, S Jaishankar, US Ambassador to India, Eric Garcetti aser Karnataka Deputy Chief Minister DK Shivakumar nunger tangokba noksa nung angur.

ANM, SCHOOL OF NURSING, IMPUR CHRISTIAN HOSPITAL
IMPUR-798615, MOKOKCHUNG, NAGALAND
EMAIL: ichabam2015@gmail.com

Ref No. ICH/SON - 2/VTC/25 - 1 Dated: 17th Jan 2025

ADVERTISEMENT

Applicants are invited for the unmarried girls for undergoing **GENERAL DUTY ASSISTANT/BEDSIDE ASSISTANT** course at Impur Christian Hospital, Impur, Mokokchung for the session 2025. The following particulars are given for information of interested candidates.

1. Forms can be availed from the Office of the School of Nursing, Impur Christian Hospital and from ABAM Website www.abam.org in the download section.
2. Last date of Form submission will be **31st January 2025**.
3. Qualification: 8th passed (Preferably 10th passed).
4. Age limit : 15 to 25 yrs .
5. Training fee will be Free.
6. Course Duration: 10 Months
7. All other details will be present on the form.
8. For details contact Miss Asong - 8119823713

Sd/
Medical Superintendent
Impur Christian Hospital



TIR YIMYIM

YIMOBILEM (EDITORIAL)

DIMAPUR KÜPTOKNÜ, JANUARY (AENJETI) 18, 2025

Tsüngrem maliba yimti !

Anogo ishika jakdang US lima nung California state kübok kanga dang nungtugu yimti Los Angeles mitsü kuma rongdokba ya temulung ashitsüka aser alima nung tesasatsü lendong tulu atalokba otsü ka asütsü. Iba mi lendong nung nisung 27 asü aser nisung lakh ana shi talidak maka kümogo. Item tasürtem rongnung temulung shirangtsüka atalokba otsüji nisung anabo, pie tsürabur mapang nungi küm aika lia aruba pei ki metoktsütet mi den raradang yangji rongseta asü aser ano nisung kabo pei jabaso temang nung mekokmein aliba agi jaja moutet aser paia ajunger mejentet, tenaprongla par kidang rongset. Iba ama mi lendong nungi mejenbutet asüba otsü ano aika ataloka alitsü, ajisüaka yimti ajak menakrepa rongdok nungji nisung mang anguba agi asürtemji jangjateper dang ashi, ano nisung aika iba mi lendong nung samar alitsü. Iba mi lendong ya arem nung mirok mi nungi tenzük ta jembir, anungji ano iba lendong ya kong komaser atalokar tejanga osangbo magütsüteter. Ajisüaka, iba mi lendong ajanga nisungtem mulungdangtsü o ka jembibaji, iba kitsükkirong lendong matalokdang, January 5 nü kasa Los Angeles yimti nung Film aser Television nung adoker nungtugu nisungtem rongnung tajungtiba aser tajungtilatem nem agütsüba konang, Golden Globe Awards agütsüba sentong nung, sentong anir Nikki Glaser-i iba konang angurtem shingaia Tsüngrem tenüng khen dang metetshibaji Tsüngrem maliba yimti nung alirtem asüba agi ta Tsüngrem atalaja metetdaksü aser lai ashibaji langzüka telokia Tsüngrem atalatsür amato menütep. Iba sentong sülen January 7 nü Los Angeles anasa mirok mi adoka yimti arongsü tenzük aser mi inseper Fire brigade purtemi miji makok tuluba tuluba rongyonga ao aser ano January 13 nübo ano tanga tesemlen nungi mi apteta yimti tesem külen arongsü tenzük ta, atangji, tsüngrem mopongi miji anishi ama mopong sashia aonba agi miji menokdangtet yimti ajak aut kuma rongdokdaksüogo. Los Angeles ya US nung nütsüng kanga aika aliba yimti ka lir aser yangji Film yangluba tesem Hollywood alinungji, atangji, nisungtem libaliruji Tsüngrema mali ama liteper. Aji oda, satan külemertema iba yimti nung lir aser atsü-apong mebentet shi azü nung japujaria medemba purtema iba yimti tasüng lir. Atangji, iba yimti nung alirtem ya Tsüngrem metetba nisungtem masü saka Tsüngrem memetetba purtem asüba agiang pei mapa nung takok aser konang angudang Tsüngrem nem tenüngsang agütsütsü meblemeter. Iba jagi tamangertem aikati Los Angeles rongdokba ya akhi tejen putu nung Sodom aser Gomora rongdoktsüba den atishitepa jembir. Iba jagi kodang bilemdangdir, tanü US lima nung, talisa, Hollywood nung alirtem libaliro aser sobalibaji Tsüngremi agizüktettsüla masü, akhi mapang Sodom aser Gomora den kecha tepila mali liteper. Aji oda, Nikki Glaseri ashi ama, atangji, Los Angeles ya Tsüngrem maliba yimti lir ta ajaki shitettsü. Atangji, alima nung kitsükkirong lendong atalokba ya tang tasen masü, aiben nisungtem mekümdangba ajanga ataloker. Ajisüaka, tang Los Angeles yimti nung atalokba kitsük kirong lendong yabo kenyongi balaka, nisung tashi agibo anendaksütetla masü atalokogo. Aiben nisungi peii ashiba, metetba aser akaba dak temulung lemer Tsüngrema mali ama bilema mezümeküma alir. Ajisüaka, asenok akaba agi aut akümtsüba agi asenoki meteta maka aser asen ajungbena asenok temang nunga kechi ataloktsüar memetet. Aji oda, asen lima nung kitsük kirong atalokba lendong dang nungibo tuluba aser takoksaba Los Angeles nung atalokba yagi asenok alidak mi kümdanga amshitsü aser kitsükkirong mapang mi inseptsü asoshi tesem ajaklen Fire Brigade purtem alitsü nungdakba indanga kanga süokia ia asenok ajak dang ashir. Iba dakji alaka, asen libaliro aser jembishinü aser mapa agi Tsüngrem jashidaksüba ajanga mi agi asenok tesama mangutsüsa asenok ajemalua Tsüngrem meteta alitsüba agi kanga tongtibang lir. Tsüngrem meteta aliba nung pei taküm kümdanga aliba dena lir. Iba jagi lendong melen temoatsü ajangzüker aser tangar nema takoksa melen teyari agütsüteter.

OLEMSABANG

INYAKSANGSHI TENÜNG SHIDAK JEMBIYIM

- T. Meren Paul, Kohima

(Yashi adok nungi...)

51. Wano athi – Wano tanük aser tejok bendanga per nung sepdangba
52. Jemji apu – Tebang nungi mopung apuokja ola adokdaksüba (wind instrument) ajak apu ta ajatsü, tat- Jemji, Jangzü, Mouth Organ, Saxophone, clarinet, Trumpet
53. Kongki atem – Oset ka nungi ola adokdaksütsü atemlokba, Piano atem, Guitar atem, CD atem
54. Tzüyok – Yimkong ayongi oagi tzü nung arh seta ango apuba dang tzüyok ta ajar
55. Alimesü – Ayong nung aliji dokoker lishi ayia lishitzü yimdaktür zütük ona ango apuba
56. Asetdang – Ayong mokdanga tzü paidoka yimdoka kongdaksür ango apuba dang asetdang ta ajar.
57. Ang ain – Pang longjenlonga kumba pereba atsülanga ang yangluba dang ang ain ta ajar.
58. Anglong azü – Ang ina aliba sü aratsü longlonga naidenba
59. Süksen monok – Sü atakdang amshitsü ajok nateter ang yimjusa nailokba, spindle
60. Sü ara – Sü ataksü atema Mongmong aser Anen na tsüngta ang naitepa temsaba
61. Sü atak – Sü metongi razüka yur süksen agi ang lenteni juokja alem agi dakokba
62. Waro ashi – Teperem sü adakdang ozübang adokdakja ang sentsü balaka pailokba.
63. Rong ayi – Rongitsü agi tzü nung ayipa rong jua odaksüba
64. Mopung semsem – Mopung temekong anepanepa aonba
65. Yipru ait – Snügdonglidong anakshidakja Mopung tesashi tashi agi aonba
66. Okzük – Chibo aonbo nungi tanüktari okshia agizükba dang okzük ta ajar
67. Yangzük – Ninag mojitsü, aontsü tumori amala milumgi senzüka aludaksüba dang yangzük ta ajar
68. Akahzük – Tzü, süngo amala pongdang, chibo, paltin nungi shizükba dang Akahzük ta ajar.
69. Alentep – Süngzü pongoka loktepa ayutepa kümdaksüba
70. Yongrak – Kechisarena Yong tatembang ana atsüteba alentepba dang yongrak ta ajar
71. Mesü – Süngzü tatembang ana paitepa pongoker atsürepba akangdaksüba
72. Sendak – Lisü pongoka alener tongnü mesura süngdong nung alenloka ayuba
73. Azüi angu – Azüi tebu agi zübu keta yirutsüba
74. Azüi anep – Azüi zübu mekettsüi tebang agi tangshiba
75. Ninangi medak – Ninangi tetsü yimlokja tesara tuoktsüba dang medak ta ajar
76. Kori atok – Kor teyangtsüng agi tesüleni ajemoktsüba
77. Peri meji – Peri tebu agi zübu keta tangshir meyim nguloktsüba
78. Mejai metep – Mejai tebo agi anguba
79. Chiboazü – Chibo soroer tzü akongtsü atema mimong züngdang misü nung ajungzüka awangba
80. Tonglem – Süngo/Aon temekong tatsük kümdaksütsü mimong nung tongdaker tsükdaksüba.
81. Tsüngrem mopung – Mopung tesashi pereta longdena tashi agi aonba, cyclone.
82. Yongsenmapa – Teburi Süng, Süngkum aser Yong agi kechisarena oset yangluba, handicraft
83. Olaangla – Tetsür südakmendak teka mapa inyakba.
84. Otsüng anem – Tangari jembiba nungi o tongti ageteta nenshiba
85. Oshilu – Kesa O aiben lephsia jembiba
86. Osü menah – Mekumdangi O aibelena jembiba tai pua O ayimba
87. Meyim teplok – Tangar dak mesüra osettsüset nung tangshiba, raksatsüba tai menaba
88. Ku asüh – Merenshidang, raratepdang tekojung ku nung amer tashi agi atsüba
89. Ku abong – Tetsür ku talang, kulang nung amer temaleni atsüshitsüba
90. Ku alen – Alemlibo nok tila techira manung ku ataloka yur süng tila agi akua ku lendok
91. Ku mejep – Tanü asüngbo kanji (scissor) agi ku tahlang akümdang mejepdokba
92. Kusünok – Ku lendoker tazüng tatsü aliba ongdoktsü merang techira tapak tila
93. Apet – Naro apet, Kumba apet, An tezüng apet, yamala
94. Meret – Süngdong nungi tu pettokba, tu meret
95. Angum – Süngdong nungi süngsang lepdokba
96. Süngtu/Süngsep – Süngdong südaksütsü süngmang longa süngkep nok agi septokba
97. Jenjang alang – Süngdongi atutsü tetsüng ajemdaksü jenjang lepdokba
98. Süngtep atep – Atang aser wahpet nung tetsüng ajemdaksü süng teploka jenjang yangluba
99. Roso angen – Süngdong tulu-i atutsü longmi nateter süngdong nung agenlokyonga atuba
100. Azük tasep – Süngdong talang azüki melamela-a asepa asepa tutetba
101. Meju/Metsüla ala – Ali temo nongzüka maotsü süng tahlang kodong angena tepdanga alaba
102. Lenpi – Nisung jajatsü lenmang pitetba
103. Kimong atu – Ki asütsü kimong tasen tutetba
104. Mesem – Tzüpo tasen yangluba, talitsü ki ka nung ayaokba - Tzüpo mesem, ki mesem
105. Ki semzük – Ki tasen mezüng lapoka nisungi semdangtsü tenzükba – Ki semzük
106. Tsüki amen – Tebur-i aonung aiür ayepba kidang-i oa tetongtetji yimtetta japojariba
107. Tsüki asen – Aonung mejangtsü asoshi tangar kidangi aoba, aruba.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

AO OSHI ANGAZÜKDAK:

TANÜ ANGAZÜKTSÜBA OJANG

Tebangmung

(adj) chitur yutsüba mung mesüra tarak (biting marks)

*Tebangmung aketba amtsükbo shingaia mechner.

Tebangnang

(adj) chiyongtsü chinüa achiba (appetite)



Tir Yimiyim

OLONG PAITEP # 7038

Grid for OLONG PAITEP # 7038 with numbers 1-16 in various cells.

TIPIEN

- 1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzük asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7037 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kiochtsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsüksü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER MA



Sweden nunger table tennis asayartem- Emil Ohlsson aser Fredrik Nilsson nati Guinness world record ka yangluogo aser iba ya table tennis rally talangtiba asayaba lir.

Tena dang Spin Duo ta ajar aser Emil Ohlsson o Fredrik Nilsson nati ghonda 13, minute 37 aser second 6 asayaa liasü. Iba ya Malmo, Sweden nung Slice Malmö ta ser ping-pong bar ka nung asaya.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Mizo teloktemi FMR agienba anema lungkak aittsü



Aizawl, January 17, 2025 (Agencies): Mizoram nung amenoka aliba Chin-Kuki-Mizo telok Zo Re-Unification Organization (ZORO)-i January 29 nü tesem balala nung lungkak aittsü osang metetdaksüogo.

Parnoki Aizawl aser state kübok tesem balala nung Free Movement Regime (FMR) agienba aser Indo-Myanmar arrtsü anasa border pass system tenzükba anema lungkak aittsü metetdaksü.

India, Bangladesh, aser

Myanmar nung Zo mesüra Mizo nung ajak senden ka amendang FMR agienba, Indo-Myanmar arrtsü atsüdangba aser Bangladeshi refugee tem yokba indang onüktem lemsatep, ZORO general secretary L. Ramdinliana Renthlei-i ashi.

Iba senden nung Aizawl aser state kübok tesem balala nung lungkak aittsü lemtet ta Renthlei-isa ashi.

ZORO-isa Centre dang Myanmar den FMR agienba sangdong meyipa agitsü

ayongzükogo.

Zo - Reunification Organization (ZORO) aser Mizoram Zirlai Pawl (MZP) teloktemi Assam Rifles ajanga Zo nung 28 apuba aittsü.

Parnok ya January 5, 2025 nü Bangladesh nungi Mizoram nung arua jenoktsü aruba liasü ta parnoki ashi.

State sorkar aser Assam Rifles-i nisung 28 nungi 11 tashi meyipa yoktsü lemtetba atema temulung raksar. State sorkari tarutsü nung Zo nung ajanga jenokdaksütsüla ta ZORO-isa metetdaksü.

Tesüiba nung ZORO-i FMR maneni tenzüksü takhangba agütsüogo.

"Ministry of Home Affairs-i tawa tu FMR melena inyakyim tasen ka tenzükogo aser iba ya arrtsü ajanga senzüba mittsü atema lir" ta Sangkawia-i ashi.

"January 1 nungi tenzükba system tasen kübok arrtsü anasa kilometer 10 telongtet nung alirtemi border pass ka meshitsüla" ta Sangkawia-isa ashi.

Mizoram sorkari kiochtsü alizüksü atema tenangzüktep agiogo

Aizawl, January 17, 2025 (Agencies): Mizoram sorkari aluyimertem dang nungi kiochtsü alizüksü atema agency 7 den tenangzüktep agiogo ta Chief Minister Lalduhoma-i ashi.

Chief minister Lalduhoma-i King Industries ajanga yangluba kiochtsü sayatsü aser item ya tanga state tem nung ayoktsü.

"Ozü sorkari nangzükba ama inyaker aser aluyimertem

dang nungi alizüksü" ta Lalduhoma-i ashi.

"Sorkari agency 7 dang nungi kiochtsü alizüksü atema tenangzükbatem agiogo aser iba ya sorkari aluyimertem dang alizükba key crops 4 rongnung ka lir" ta pai ashi.

"Kiochtsü alizükba agencies mesüra talirtemi sorkar facility tem amshitsü. Sorkarisa tangar nem kiochtsü alizükdaksünür kechiyong tetoktep alitsüla" ta

CM Lalduhoma-isa ashi.

"Sorkari February 20 nungi farmer societies 675 ket nungi süngmok alizüksü" ta Agriculture minister PC Vanlalruata-ia ashi.

Zoram People's Movement (ZPM)-i yaküm December ita election nüboymdang sorkar kümra key crops pezü- ginger, turmeric, Mizo chilli aser broomsticks alizüksü ta nangzüka liasü.

Bishnupur nung kaketshir ka tepsetba anema lungkak ait

Imphal, January 17, 2025 (Agencies): Manipur Police commando-i school kaketshir ka tepsetba aser village volunteers 6 apuba anema Hokolbarnü Meira Paibi temi Bishnupur district nung lungkak aitogo.

Meira Paibi temi Phumlou Community Hall nung iba atema lungkak aitba sentong ka agi.

Thoubal district kübok Salungham nung December 14 nü iba ya ataloka liasü.

Valley district kübok tesem balala nung Joint Action

Committee (JAC) lenisüba kübok iba tatalokba anema sentong balala ayongzüka agiogo.

Salungham nung sepaitem den khatepdang Thoubal Khunnou nung alir Class 10 kaketshir Laishram Prem khaset, ta Manipur Police-i ashi.

Iba mapang sepaitemi nisung 6 apu, ta parnoki ashi. Prem ya telungpur telok nung züngsem ka liasü ta police-isa metetdaksüogo.

Ajisüaka, par kibong, JAC, aser local Meira Paibi temi iba ya magizüker aser parnoki

ashiba agi Prem ya village volunteer ka aser kaketshir ka liasü ta ashir.

JAC-isa volunteers ajak tatemzükba kecha melii chiochtsü atema takhangba agütsüogo.

Parnok ket nung police armory nungi auya bener aoba prangpong-injangtem ngutetogo ta police-isa ashi.

December 27-28 nü JAC-i Salungham nung iba tatalokba ajanga kongshirtem asoshi temeten meshia lungkak aita liasü.

GOVERNMENT OF NAGALAND
DIRECTORATE OF SCIENCE & TECHNOLOGY
NAGALAND: KOHIMA.
e-mail : dir.scitech-ngl@nic.in

No.S&T-138/2021:

Dated Kohima, the Jan,2025.

NOTICE

It is hereby notified for the attention of all candidates who have applied to the post of MTS vide advertisement No. S&T -138/2021 Dated Kohima, the 28th Sept.2024, to report to the Office of the Director, Science & Technology Department along with their original documents on 28th Jan, 2025 at 10:00 A.M onwards for aptitude test & interview. No separate calling letter will be issued.

(KEVITSO KENNETH)
Chief Scientific Officer.

Al-Qadir Trust ken o nung Imran Khan aser kinungtsü tepuokdak ayutsü

Islamabad, Aenjeti/January 17 (Agencies): Sen £190 million jenjang Al-Qadir Trust ken o nung taoba Pakistan ato kilonser Imran Khan kum 14 tepuokdak ayutsü obendang agütsüogo aser pa kinungtsü Bushra Bibi ya kum tenet ayutsü.

Bushra Bibi ya Rawalpindi nung aliba Adiala Jail nung apu, kong Khan ya 2023 kum August ita nungi puoka liasü. La iba telemtetba angadaksütsü anir aru.

Iba ken o ya Al-Qadir University Project Trust nung Khan-i shilemagia tim masüba nung tashi amshiba aser ochimashiba indang lir.

Taoba kum mangatettep aliba general elections agir mapang tatsüka dang lir tena anema taoba kum February 27 nü ken o benoka liasü. Imran Khan ya ken o balala dak sendakba nung August 2023 nungi tepuokdak yua lir, koba yimdenren tsütsü nungi inyaker ta paibo ashir.

2024 kum pa Cipher aser Iddat ken o nung temeden angu, saka December ita Toshakhana 2 ken o nung ano aitsü.

Ken o ya Pakistan indang National Accountability Bureau (NAB) ajanga benok aser Pakistan sorkar amshitsüba sen sernung Bahria Town Karachi ajanga ali alitsü aliba indang account nung inoktsü aser yangji Khan-i tongti shilemagia ta aitsü.

Pakistan nung sen 50 billion amshitsü melaba mechi Bahria Town Ltd nungi Imran Khan aser Bushra Bibi nem Pakistan nung sen aika den kanals noklang aika aliba ali agütsü, ta ken o nung tai tonglokja lir aser ibai jangjateta taoba PTI sorkar mapang United Kingdom-i Pakistan nem meyipa agütsüogo ta ashir.

Obendang ya December 23 nü agütsütsü liasü, saka winter vacations aliba mechi Islamabad accountability court ajanga January 6-i thinen.

Pai inyakba kuli agütsütsü aser tali tejangjaba agütsütsü asoshi aiben maongka agüjaka Khan-i asaa tebilemba tamajung nung kuli agütsütsü memulung, ta NAB ajanga ashi.

Iba ken o nung property tycoon Malik Riaz Hussain aser par jabaso Ahmed Ali Riaz, Mirza Shehzad Akbar aser Zulfi Buk-hari nung daka temulung melemi lir. Bushisüngdangba aser okadak ken o jembidang parnok maden aser jenshia senzü aser tatem nung 'proclaimed offenders' ta sangdong.

Imran Khan den junga metettepa alirtemi ashiba agi, imlaa aliba ama court nungi obendang agütsüogo.

"Obendanger tem dang army ajanga tashitsü shir liasü. Ken o jembiba mapang Imran Khan nem maongka shidak

magütsü," ta parnoki ashi.

Ibai taoba ato kilonser aitsüba ken o tulu pezü buba alitsü.

Taoba mapang ken o asem nung aitsüba 2024 kum January ita sangdonga liasü aser item ya sorkar indang sempet ayokba, linük indang miim mapa temai adoktsüba aser ozüing alema kibong akumba indang liasü, saka ajak nung pa medentsü mesüra ken o anendaka lir.

Ajisüaka ano pa anema ken o aika benoka aliba mechi Khan ya tepuokdak dang yua liasü.

Al-Qadir Trust ken o dak sendakba nung Khan ya May 2023 nung mezüing pua liasü aser anogo ana mejungi tepuokdak ali. Ajisüaka pa apuba mechi linük tesem ajungalen longkak ait tenzüka Khan bhukumer temi yimti aika nung rongrongshirong adokdaksü.

Khan okatsür Faisal Fareed Chaudhry-i iba telemtetba ya aitsü aser ibai Khan aser pa kinungtsü anema "bogus persecution" lir ta aitsür.

"Iba ken o kisüing nung dang NAB senjang kata meindoker," ta okatsüri ashi.

Sorkar senotsü akoksaba mesüra Al-Qadir Trust aser Khan mesüra par kibong senotsü tajangzük anguba indang NAB-i kuli magütsütet, ta Chaudhry-i ashi.

S Korea Tir Yoon-i tasüngdangba langzütsü memulunger

Seoul, Aenjeti/January 17 (Agencies): Mapang tatsüka atema martial law sangdongba mechi asüngdangyaba langzütsü memulungba mechi ken o benoka alisang Tir Yoon Suk-yeol pua aliba mapang atsülangtsü lenmang bushitsü ta South Korea anticorruption investigators temi ashi.

Yoon pua ayuba anogo 20 tashi atsülangtsü atema court ka dang temelaba asüngdangtsü, ta South Korea indang Corruption Investigation Office for High-ranking Officials (CIO) ajanga Hokulbarnü ashi.

B o d h b a r n ü bushisüngdangba temi Seoul nung anepbongi Yoon aliba ki meita oa pa apuba ya South Korea puti otsü nung tir teinyakdak ka tepuokdaka bener aor mezüingbuba akum.

Bodhbarnü mapa kuma

inyakba warrant kübok bushisüngdangba dang mangatettep agi sünga aliba lenir ya ghonda 48 tashi par ket nung ayutsü mela lir.

Bushisüngdangba aser presidential security tsüingta par kima hopta ka dak tema atsütepa arur apuba ya ozüing kechi agi mela lir ta Yoon okatsür temi asüngdangba Seoul Central District Court ajanga Brehostibarnü magizük.

December 14 nü pa anema ken o benokba sülen Yoon ya khen atema office-i meyoki soita lir aser sorkar anema nokdakba densema aibelen balala atema bushisüngdangba mapang lir, aser item ken o nung aitsüra pa takum tepiyong tepuokdak ayutsü mesüra tasüba agi merenshitsü, saka South Korea nung mapang talangka nungi tasüba temerenshi mamshir.

SÜR KÜM KA ABENSAR



Lt. Temjeninla (Chuchuyimlang) Tasüba anogo 18/01/2024

Temeim Oja Nai onok toktsür orr kum ka abensa aruogo saka tanü tashi onoki na mamateter, Tongtipangsa nai sayutsüngi ashiba O-tem aser nai onok asoshi mapang ajak nung sarasademtsüba ola to onoki teti bilemtetsü.

Oja onoki na kanga meim aliasü ako, tanü na asüba anogo bilemteta onok mulung kanga shiranga amongerani.

- Temeim Chinur, Semchisemnur aser Kinungertem.

ALL INDIA INSTITUTE OF MEDICAL SCIENCES
ANSARI NAGAR, NEW DELHI - 110 608
EXAMINATION SECTION
Common Recruitment Examination (CRE) -2024
Advertisement No. 98/2024



Ministry of Health and Family Welfare kübok Participating AIIMS aser Central Government Hospitals nung Group-B&C posts balala atema nübu shimtsü Common Recruitment Examination (CRE)-2024.

Participating Institutes/Hospitals ajanga tenung nung Group-B&C posts balala asoshi temsüa aliba India senso nungi online application meshir.

Online Registration for applications	
Start Date	7 th January 2025
Close Date	31 st January 2025
Date of Recruitment Examination	
Date of issuing of Admit Card	Three days before the examination
Intimation of exam city of examination centre	One week before the examination
Date of Exam	26 th to 28 th February, 2025

APPLICATION FEES:

- A) General/OBC Candidates : Rs.3000/- (Rupees Three Thousand only)
- B) SC/ST Candidates/EWS : Rs.2400/- (Rupees Twenty-Four Hundred only)
- C) Persons with Disabilities : Exempted

- Candidate temi application fee ya DEBIT CARD/CREDIT CARD/NETBANKING ajanga agütsütettsü. Transaction/ Processing fee, kar danga lira, candidate temi bank nem agütsütsüba.
- Application fee khen agütsüba kechi tensa arudir aruaka tanaben meyipa mangutsü.
- Fee maliba applications khenyongi magizüksü.
- Tatidang agütsür SC/ST indang Application Fees ya results sangdonger mapangtong nung meyipa agütsütsü.

Tongtipang: Osang tejangja metettsü atema website www.aiimsexams.ac.in nung mesüra participating Institute/Hospital nung angutsü.

- Application indang status aser temsüa aliba candidate indang Admit cards ya AIIMS website www.aiimsexams.ac.in nung upload sütsütsü. Application agütsüba mapang timtem ajurura, credentials amshia My Page (Dashboard) nung asüngdangyatsü akok.
- Applicants ajungia mapang shia website lapoka reprangtsüla, kechiaser iba sülen metongshiba/melenshiba/updates ajak website kisüing nung upload sütsütsü.

Sd/-
ASSISTANT CONTROLLER (EXAMS.)

CBC 17112/11/0030/2425

MULUNGNEN O



Asür Imtimeren
Tasoba: 17-02-2002
Tasüba: 11-01-2025
Changtongya



Asür Ajidong
Tasoba: 06-08-2003
Tasüba: 11-01-2025
Changtongya Yimsen



Asür Imnatila
Tasoba: 14-03-2005
Tasüba: 11-01-2025
Yaongyimsen

Onoki teti meima aliba jala ka aser jabaso ana, ajungben lendong nung akhümlü wadang tembanger alidang ana aser talang nungi kija, kibong aser lokti balala shirnokisa onok dak malangba rongsen, nübu aser sarasadem ajanga nungita yaritepogo, nenok ajak dang kinungertemi kangasa pelaba lemsateper. Mangyim nüktzü agi nungbanger teimla makai alidang nenok temeim, sarasadem aser tenungitba ajanga tesünep aser anisüngzük tulu bener arutsüogo. Nenoki aria bilemetsüba aser temeim mapatem onoki kodanga mamatsü aser temulung nung teti alitsü. Tsüngremi nenok ajak moatsütsü onok tamang sarasadem.

~ Temeim Tsüraburtem, Adianutem aser Kinungertem.

Gauff pre-quarter tongogo, Osaka yirur anen



Melbourne, Aenjeti/January 17 (Agencies): Australian Open 2025 tenzükler hopta tanabuba arudang Coco Gauff-i Hokulbarnü Leylah Fernandez madak straight-sets nung takok angu.

America tsür world number 3 Gauff yagi Melbourne asayamung akoktsü ama aikati imlar aser lai Rod Laver Arena nung seed 30 buba nung alila Canada tsür Fernandez madak round tasembuba nung 6-4, 6-2 agi takok ngua liasü.

Tang season tenzükler Gauff-i match ti asayaba nung set kata nunga tamakok ajurua mali aser season tenzükla United Cup nunga kija asaya pongu prong nung takok angu aser iba mapanga lai Fernandez madak 6-3, 6-2 agi takok ngua liasü.

"Tanü asaya tasakba liasü, kechiaser lai ni meteta lir aser United Cup dang nungi tanü tera balaka asaya amai bilemer," ta Gauff-i ashi, shiba overall 12-match winning streak lir.

"Leylah ya tetokteper tajung, asayar tajung, nisung tajung, anungji hopta ana tejekdang ni takok nguaka tanü asaya tasakba asütsü ta ni meteta liasü."

2023 US Open champion Gauff ya taoba küm Australian Open semi-final nung Aryana

Sabalenka-i tsükdaksü aser ibaji Melbourne Park nung la asoshi asaya tajungtiba lir.

Lai taküma world number 1 aser iba asayamung anaben defending champion den asayatsü.

Aji masüdang arushi küm 20 tain Gauff ya quarter-finals atema Belinda Bencic ajurutsü, shiba Naomi Osaka yirur anenba yong pre-quarters tonga lir.

2021 US Open final nung tsükla world number 29 Fernandez ya tang mezüngbuba Melbourne nung round tasembuba tonga liasü, saka lai Gauff maziüktet.

Kasa asayamung nung Australian Open champion anaben bena alila Naomi Osaka, Hokulbarnü Melbourne nung round tasembuba Belinda Bencic den asayadang yirur anentsüsa akum.

Asaya tenzükler set mezüngbuba 6-5 nung lia Osaka tepok nung teyari agitsüsa akum aser tiebreak nung tamakok ngur teka salemer court yutsür ao.

Osaka ya Auckland final nunga tepok nung timtem ajurua asaya nungi anentsüsa akum.

Japan tsür Osaka ya la tetong aser lar jala Shai tebu

Cordae den balaogo ta taoba hopta sangdonga liasü.

Ajisüaka taoba mapang world number 1 nung alila temulung lema Melbourne-i arua liasü aser la yiruba tajungba akumer ta ashi.

Shia asoba sülen Grand Slam champion pezüben bena alila Osaka-i tang mezüngbuba Slam ka indang round tasembuba tonga liasü, aser iba asayamung nung lai Caroline Garcia aser Karolina Muchova na madak takong ngur tongtet.

Ajisüaka Melbourne Park nung tenaprong den sets asemsem asaya aser ibaji ajanga la temang nung timtem ya ajuru südi ta amanger.

Bencic den asayadang mezüng set 5-2 agi Osaka temaba jenjang nung liasü, saka serve aser la senzüsempingba nung timtem ajurua Tokyo Olympic champion Bencic-i draw level tongtet aser tie break nung Bencic-i 7-3 agi akok.

Iba sülen Osaka masayateti John Cain Arena nungi fans dak teka ayiploksür ao.

"Iba asaya yamai metembangnü. Asaya tajung asütsü ta bilema liasü. La yakta taneptsü nunga taküm tanüngba asayamung nung junga asayatsü imlar," ta Bencic-i ashi.

Erling contract tasen zülutepogo

Manchester, Aenjeti/January 17 (Agencies): Manchester City striker Erling Haaland-i club den contract tasen ka zülutepogo, anungji pa Etihad nung 2034 tashi alitsü.

Norwegian nungba ya Dortmund nungi 2022 küm City-i aru aser iba sülen pai iba club atema 126 ben asayaba nung goal 111 agüja lir.

Haaland indang taoba tezüngzüktep nung pa club nungi yoktsüa shisema liasü, aser iba tezüngzüktep ya 2027 nung tembangsü liasü.

Haaland tezüngzüktep tasenba ya küm toku ser tesadang asoshi lir, aser iba yongji pa arishi küm 34 tashi City nung alitsü.

Haaland indang tezüngzüktep ya Premier League nung talangtiba alitsü aser taoba küm August ita Cole Palmer-i küm toku atema Chelsea den zülutepa aliba alemer.

"Contract tasen zülutepba atema ni kanga pelar aser iba club nung ano mapang tali indoktsü yongya atar," ta Haaland-i ashi.

"Manchester City ya club balaka lir, kong nisung tajung den supporters tajung lir aser yangi nisung ajak dak nungi tajungtiba adokdaksür."

"Ni (manager) Pep (Guardiola), pa indang coaching staff, külem asayar aser club



nung alir ajak dang kanga pelar, kechiaser parnokni ni kanga yaria arur," ta ashi.

Pep Guardiola-ia pa küm ana asoshi contract tasen yanglushitsü telemteba agir ita ana sülen Haaland indang contract zülushir alitsü.

Germany nungi aruba sülen Norway nunger Haaland-i Premier League titles ana, FA Cup ka, Champions League ka aser Super Cup ka nung takok nguogo. Haaland ya taoba mapang City nungi midfield asayar Alf-Inge'er jabaso lir aser pai tang season nung City asoshi asaya 28 nung asayadang goal 21 agütsüteta lir.

Premier League table nung tematiba jenjang nung aliba Liverpool dang nungi defending champions ya points 12 agi tajemba nung lir.

Pujenvong FC-i 16th Saramati Soccer Championship 2025 akok

Dimapur, Aenjeti/January 17 (TYO): Public Ground, Pungro nung "Victory through Teamwork" omen nung ajemdaker ayongzükba 16th Saramati Soccer Championship 2025 asayamung January 17, 2025 nü tembangogo.

Pujenvong FC ajanga iba asayamung takok marok ajungket aser Tsuwong FC ajanga tanabuba jenjang ngutet. Iba football asayamung ya Saramati Nexus Club ajanga Department of Youth Resources & Sports, Government of Nagaland den lungjemer ayongzükba liasü.

Iba asayamung tembangba sentong nung sentong akhumdong ka ama Advisor, Youth Resources & Sports, Nagaland, S Keoshu Yimkhiung-i saisapong sempet alirtem ya mapang indoker ama mezüngshitsüla saka area nung lanur football asayartem asoshi sapang agüja kanga junga asayamung ayongzüktsüla, ta

ashi. Pai asayartem dang pei sempet nung rangloksü ajungshia liasü.

Saisapong ajanga temang anema aliba yinya sübar, moko aser menüngdakba chiyongtsü achiba nungi lanurtem jembua alitsü asoshi awareness agütsür aser tematiba jenjang nung asayatsü atema maongka agütsür, ta pai ashi. Iba amala sentong yagi asayartem temai adoka saisapong nung shilem agitsü lenmang lapoktsütsü, ta pai ashi.

Iba sentong nung Throngso K-i tir o jembi aser Convener, Mini Hornbill festival 2025 and Additional Director, Youth Resources & Sports, Nagaland, Hosito Elias-ia o tatsüka jembia liasü aser Lensola-i temeja ken ka aten.

Iba sentong nung Saramati Nexus Club tongti zülur Adelin menden liasü aser Fr. Peter Pithungo, Parish Priest, St. Parish Pungro ajanga sarasadema liasü.

Panama Football Federation tir nem tenokdangba agütsü

Panama City, Aenjeti/January 17 (Agencies): Panamanian Football Federation ajanga Brehostibarnü ashiba agi, par Federation tir Manuel Arias-i asayar ka dang temang tulu ta ajaba mechi FIFA-i ita trok pa mapa meinyaktsü tenokdangba agütsüogo.

Panama national team aser Turkey indang Fenerbahce club asoshi asayala Marta Cox anema Arias-i tim masüba ojang amshiba yong tenokdangba ya agütsü.

Panama nung tetsür football aitsüba mechi March 2023 nung Arias-i osangbener den jembidang arishi küm 27 tain Cox dang temang tulu ta



aja. Cox-i Panama nung amateur league ka lir, kong asayar timba itasen mangur mesüra stadium mesüra training facilities shidak mangur ta shia liasü.

"La temang tulu kimogo, la mangshi-mangtem, lai asayadak masemteter," ta

Arias-i shia liasü.

Cox-i national team yutsütsü ta amokmeren, anungji Arias-i tatok meshi.

Pai iba o jembiba ya kanga tia maka ta ashi aser pai aibelenba yong temerenshi agütsüba agizükler ta Brehostibarnü shia liasü.

BILEMDANGANG

"Na memenüba anogoji amajok nung süyidaktsüba anogo alitsü."